

ORDENANZA Nº 4

ORDENANZA FISCAL REGULADORA DO IMPOSTO SOBRE ACTIVIDADES ECONÓMICAS

ARTIGO 1.- NATUREZA E FUNDAMENTO.

O Imposto sobre Actividades Económicas é un tributo directo de carácter real, establecido con carácter obrigatorio no RDL 2/2004 de 5 de marzo (TR da Lei Reguladora das Facendas Locais) e regulado de conformidade co que dispoñen os artigos 78 e 91 da citada disposición legal.

ARTIGO 2.- FEITO IMPOÑIBLE.

1. O feito imponible deste imposto está constituído polo mero exercicio en territorio nacional, de actividades empresariais, profesionais ou artísticas, exérganse ou non en local determinado e estean ou non especificados nas tarifas do imposto.

2. Consideraranse, a efectos deste imposto, actividades empresariais, as gandeiras, cando teñan carácter independente, as mineiras, industriais, comerciais e de servizos. Non teñen, por tanto, tal consideración as actividades agrícolas, gandeiras dependentes, forestais e as pesqueiras, non constituíndo ningunha delas, feito imponible deste imposto.

3. Aos efectos previstos no parágrafo anterior, terá a consideración de gandería independente, o conxunto de cabezas de gando que se atope comprendido nalgún dos casos seguintes:

- a) Que paste ou se alimente fundamentalmente en terras que non sexan explotadas agrícola ou forestalmente polo dono do gando.
- b) O estabulado fóra das fincas rústicas.
- c) O transhumante ou trasterminante.
- d) Aquel que se alimente fundamentalmente con pensos non producidos na finca na que se críe.

4. Considérase que unha actividade se exerce con carácter empresarial, profesional ou artístico, cando supón a ordenación por

conta propia de medios de produción e de recursos humanos, ou de un deles, coa finalidade de intervir na produción e distribución de bens e servizos.

5. O exercicio das actividades gravadas probarase por calquera medio admisible en dereito, polos contemplados no artigo 3 do Código de Comercio e en particular por:

- a) Calquera declaración tributaria formulada pola persoa interesada ou polos seus representantes legais.
- b) Recoñecemento pola persoa interesada ou os seus representantes legais en dilixencia, en acta de inspección e en calquera outro expediente tributario.
- c) Anuncios, circulares, mostras, rótulos ou calquera outro procedemento publicitario que poña de manifesto o exercicio dunha actividade económica.
- d) Datos obtidos nos libros ou rexistros de contabilidade levados por toda clase de organismos ou empresas debidamente certificados polos encargados dos mesmos ou pola propia Administración.
- e) Datos facilitados por toda clase de autoridades por iniciativa propia ou a requirimento da Administración competente.
- f) Datos facilitados polas Cámaras de Comercio, Industria e Navegación, Colexios e asociacións profesionais e demais institucións e asociacións oficialmente recoñecidas, por iniciativa propia ou a requirimento da Administración.

6. Teñen a consideración de actividades empresariais, a efectos deste imposto, as mineiras, industriais, comerciais e de servizos, clasificadas na sección 1^a das Tarifas aprobadas polo Real Decreto Lexislativo 1175/1990 de 28 de setembro. Así mesmo, as actividades de gandería independente reguladas por Real Decreto Lexislativo 1259/1991 de 2 de Agosto que contén Tarifas e Instrución.

7. Teñen a consideración de actividades profesionais, as clasificadas na sección 2^a das Tarifas, sempre que se exerzan por persoas físicas. Cando unha persoa xurídica ou unha Entidade das previstas no artigo 35.4 da Lei Xeral Tributaria, exercese unha actividade clasificada na Sección 2^a das Tarifas, haberá de matricularse e tributar pola actividade correlativa ou análoga da Sección 1^a daquelas.

8. Teñen a consideración de actividades artísticas as clasificadas na Sección 3ª das Tarifas.

ARTIGO 3.- NON SUXEIÇÃO.

Non constitúe feito impositivo deste imposto o exercicio das seguintes actividades:

- a) A enaxenación de bens integrados no activo fixo das empresas que figurasen debidamente inventariados como tal inmovilizado, con máis de dous anos de antelación á data de transmisión, e a venda de bens de uso particular e privado do vendedor, sempre que os tivesen utilizado durante igual período de tempo.
- b) A venda dos produtos que se reciben en pago de traballos persoais ou servizos profesionais.
- c) A exposición de artigos co fin exclusivo de decoración ou adorno do establecemento. Pola contra, estará suxeita ao imposto, a exposición de artigos para regalo aos clientes.
- d) Cando se trate de venda ao miúdo, a realización dun só acto ou operación illada.
- e) As actividades agrícolas, gandeiras dependentes, forestais e as pesqueiras.
- f) A utilización de medios de transporte propios, nin a reparación en talleres propios, sempre que a través de uns e doutros, non se presten servizos a terceiros.

ARTIGO 4.- SUXEITO PASIVO.

Son suxeitos pasivos deste imposto, as persoas físicas e xurídicas e as entidades a que se refire o artigo 35.4 da Lei 58/2003 Xeral Tributaria, sempre que realicen en territorio nacional calquera das actividades que orixinan o feito impositivo.

ARTIGO 5.- EXENCIÓNS.

1. Están exentos do Imposto:

- a) Estado, as CCAA e as Entidades Locais, así como os respectivos Organismos Autónomos e as Entidades de Dereito Público de análogo carácter das CCAA e das Entidades Locais.

b) Os suxeitos pasivos que inicien o exercicio da súa actividade en territorio español durante os dous primeiros períodos impositivos deste imposto en que se desenvolva a mesma.

b.1) A estes efectos, non se considerará que se produce o inicio do exercicio dunha actividade cando a mesma se desenvolvera anteriormente baixo outra titularidade, circunstancia que se entenderá que concorre, entre outros supostos, nos casos de fusión, escisión ou aportación de ramas de actividade.

c) Os seguintes suxeitos pasivos:

- As persoas físicas, sexan ou non residentes en territorio español.
- Os suxeitos pasivos do Imposto sobre Sociedades, as Sociedades civís e as entidades do artigo 35.4 da Lei 58/2003 de 17 de decembro, Xeral tributaria, que teñan un importe neto da cifra de negocios inferior a 1.000.000 euros.

No relativo ás e aos contribuíntes polo Imposto sobre a Renda de non residentes, a exención só alcanzará aos que operen en España mediante establecemento permanente, sempre que teñan un importe neto da cifra de negocios inferior a 1.000.000 de euros.

A efectos da aplicación da exención prevista nesta letra, teranse en conta as seguintes regras:

1ª. O importe neto da cifra de negocios determinarase de acordo co previsto no apartado 2 do artigo 35 do Código de Comercio.

2ª. O importe neto da cifra de negocios será, no caso dos suxeitos pasivos do Imposto sobre Sociedades ou dos contribuíntes polo Imposto sobre a Renda de non Residentes, o do período impositivo cuxo prazo de presentación de declaracións por ditos tributos finalizara o ano anterior ao de devindicación deste imposto. No caso das sociedades civís e das entidades a que se refire o artigo 35.4 da Lei 58/2003, de 17 de decembro, Xeral Tributaria, o importe neto da cifra de negocios será o que corresponda ao penúltimo ano anterior ao de devindicación deste imposto. Se dito período impositivo tivera unha duración inferior ao ano natural, o importe neto da cifra de negocios elevarase ao ano.

3ª. Para ó calculo do importe neto da cifra de negocios do suxeito pasivo, terase en conta o conxunto das actividades económicas exercidas por el.

Non obstante, cando a entidade forme parte dun grupo de sociedades por concorrer algunha das circunstancias consideradas no apartado 1 do artigo 42 do Código de Comercio como determinantes da existencia de control, con independencia da obriga de consolidación contable, o importe neto da cifra de negocios referirase ao conxunto de entidades pertencentes a dito grupo.

Aos efectos do disposto no parágrafo anterior, entenderase que os casos do artigo 42 do Código de Comercio son os recollidos na sección 1ª do Capítulo I das normas para formulación das contas anuais consolidadas, aprobadas por Real Decreto 1159/2010 de 17 de setembro.

4ª. No suposto dos a das contribuíntes polo imposto sobre a Renda de non residentes, atenderase ao importe neto da cifra de negocios imputable ao conxunto dos establecementos permanentes situados en territorio español.

d) As Entidades Xestoras da Seguridade Social e as Mutualidades de Previsión social reguladas polo Texto Refundido da Lei de Ordenación e Supervisión de Seguros Privados aprobado polo RDL 6/2004 de 29 de outubro.

e) Os Organismos Públicos de investigación, os establecementos de ensinanza en tódolos seus grados costeados integramente con fondos do Estado, das Comunidades Autónomas ou das Entidades Locais, ou por Fundacións declaradas benéficas ou de utilidade pública, e os establecementos de ensinanza en tódolos seus grados, que, carecendo de ánimo de lucro, estiveran en réxime de concerto educativo, incluso se facilitasen aos seus alumnos libros ou artigos de escritorio ou lles presten os servizos de media pensión ou internado, aínda que por excepción vendan no mesmo establecemento os produtos dos talleres dedicados a dita ensinanza, sempre que o importe de dita venda, sen utilidade para ningún particular ou terceira persoa, se destine á adquisición de materias primas ou ao sostemento do establecemento.

f) As Asociacións e Fundacións de diminuídos físicos, psíquicos e sensoriais, sen ánimo de lucro, polas actividades de carácter pedagóxico, científico, asistencial e de emprego que, para o ensino, educación, rehabilitación e tutela dos minusválidos, realicen, aínda que vendan os produtos dos talleres dedicados a ditos fins, sempre que o importe de dita venda, sen utilidade para ningún particular ou terceira

persoa, se destine exclusivamente á adquisición de materias primas ou ao sostemento do establecemento.

g) A Cruz Vermella Española.

h) Os suxeitos pasivos aos que lles sexa de aplicación a exención en virtude de Tratados ou Convenios Internacionais.

i) As Entidades sen fins lucrativos, polas explotacións económicas a que se refire o artigo 7 da lei 49/2002 de 23 de decembro, de Réxime Fiscal das Entidades sen fins lucrativos e dos Incentivos Fiscais o Mecenazgo.

Non obstante, ditas Entidades deberán presentar declaración de Alta na Matrícula do Imposto e declaración de Baixa no caso de cese no exercicio da actividade.

A aplicación da exención prevista na Lei 49/2002 de 23 de decembro de Réxime Fiscal das Entidades sen fins lucrativos e dos Incentivos Fiscais o Mecenazgo, estará condicionada a que as Entidades sen fins lucrativos, comuniquen o Concello o exercicio da opción, regulada no artigo 14.1 da citada Lei 49/2002, e ao cumprimento dos requisitos regulados no Título II da citada Lei.

2. Os suxeitos pasivos aos que se refiren os parágrafos a), d), g) e h) do apartado anterior non estarán obrigados a presentar declaración de alta na Matrícula do Imposto.

3. O Ministro de Facenda establecerá en qué supostos a aplicación da exención prevista no apartado c) do punto 1 anterior esixirá a presentación dunha comunicación dirixida a Axencia Estatal de Administración Tributaria na que se faga constar que se cumpren os requisitos establecidos en dito apartado para a aplicación da exención. Dita obriga non se esixira, en ningún caso cando se trate de contribuíntes polo Imposto sobre a Renda das Persoas Físicas.

Os suxeitos pasivos que tiveran aplicado a exención prevista no apartado b) do punto 1 anterior presentarán a comunicación, no seu caso, o ano seguinte ao posterior ao de inicio da súa actividade. A estes efectos, o Ministro de Facenda establecerá o contido, prazo e a forma de presentación de dita comunicación, así como os supostos en que haberá de presentarse por vía telemática.

No relativo as variacións que puideran afectar á exención prevista no apartado c) do punto 1 anterior estarase ao previsto no artigo 12.4 da presente Ordenanza.

4. As exencións previstas nos parágrafos b), e), f) e i) do apartado 1 deste artigo terán carácter rogado e concederanse, cando proceda, a instancia de parte.

ARTIGO 6.- BONIFICACIÓNS E REDUCIÓNS.

1. Os suxeitos pasivos que inicien o exercicio dunha actividade empresarial cualificada polo Concello como proxecto empresarial de interese municipal (PEIM), e tributen por cota municipal, gozarán, trala exención regulada no artigo 5.1.b) desta Ordenanza, durante os cinco exercicios seguintes dunha bonificación na cota do 50%.

2. Os suxeitos pasivos que inicien o exercicio de calquera actividade empresarial e tributen por cota municipal, gozarán trala exención regulada no artigo 5.1.b) desta Ordenanza, durante os cinco exercicios seguintes dunha bonificación na cota do 30%. Esta beneficio non será de aplicación no caso de que fose procedente a bonificación regulada no apartado 1) anterior.

2.1. Para poder gozar desta bonificación requírese que a actividade económica non fora exercida anteriormente baixo outra titularidade, nin baixo a mesma. Entenderase exercida anteriormente baixo outra titularidade, entre outros, nos seguintes supostos:

- a) Fusión, absorción ou aportación de ramas de actividade.
- b) Transformación de Sociedades.
- c) Que a persoa titular que se da de alta sucedera na explotación da actividade a un familiar vinculado a el por liña directa ou colateral ata o segundo grado en consanguinidade ou afinidade.
- d) Cando a persoa titular que se da de alta fose unha Comunidade de Bens ou Sociedade, na que os comuneiros ou socios exerceran anteriormente unha actividade empresarial das comprendidas na Sección 1ª das Tarifas.

2.2. Aos efectos do outorgamento desta bonificación, entenderase que o suxeito pasivo non inicia a actividade nos seguintes supostos, entre outros:

- a) Cando a alta sexa consecuencia dun cambio dun epígrafe a outro dentro das actividades clasificadas na Sección 1ª das Tarifas, sexa este cambio voluntario, por imperativo legal ou para emendar unha cualificación anteriormente errónea.
- b) Cando a alta signifique unha ampliación de actividade empresarial por estar xa de alta en algún epígrafe da Sección 1ª das Tarifas.
- c) Cando a alta sexa consecuencia da apertura dun novo local afecto a unha actividade que xa está exercendo.

2.3. Os suxeitos pasivos que consideren ter dereito á bonificación por inicio de actividade e cumpran todos os requisitos establecidos nos apartados 2.1 e 2.2 anteriores presentarán solicitude expresa de bonificación achegando:

- Declaración xurada de non ter exercido con anterioridade as actividades empresariais para as que solicita bonificación, nin suceder nas mesmas a outra persoa titular
- Escritura de constitución da sociedade.

A concesión deste beneficio fiscal, surtirá efectos para o exercicio seguinte a aquel no que se formule.

3. Cando se realicen obras nas vías públicas que teñan unha duración superior a tres meses dentro do mesmo período impositivo e afecten a locais nos que se realicen actividades clasificadas na división 6ª da Sección 1ª das Tarifas, os suxeitos pasivos que tributen por cota municipal terán dereito, previa solicitude e posterior informe técnico favorable, a unha redución na cota do imposto do 50% no exercicio no que se desenvolveron as obras.

Para a aplicación desta redución, o suxeito pasivo deberá formular solicitude expresa daquela no prazo máximo dun mes dende que o local deixara de estar afectado polas obras, sexa porque estean finalizadas totalmente ou a súa continuación xa non afectase ao tramo onde está radicado o local.

Se as obras se prolongasen máis do 31 de decembro, os suxeitos pasivos formularán a correspondente solicitude de redución do ano finalizado, antes do 31 de xaneiro.

No caso de cese de actividade, o prazo máximo será dun mes dende a data de baixa no imposto.

As solicitudes de redución formuladas fora do prazo dun mes de finalización das obras ou ben con posterioridade ao 31 de xaneiro, no caso de obras non terminadas a 31 de decembro anterior, non serán estimadas. Excepcionalmente poderán ser estimadas, se a liquidación na que debe surtir efectos a redución, non tivese adquirido firmeza

Os suxeitos pasivos que, eventualmente puideran resultar beneficiados pola redución regulada neste apartado deberán, sen embargo, satisfacer o importe total dos recibos no período normal de cobranza. Unha vez concedida a redución poderán solicitar devolución de ingresos indebidos polo importe daquela.

4. As Cooperativas, así como as Unións, Federacións e Confederacións das mesmas e as Sociedades agrarias de transformación terán a bonificación prevista na Lei 20/1990 de 19 de decembro, sobre Réxime Fiscal das Cooperativas.

5. Os suxeitos pasivos que tributen por cota municipal e incrementen nun 10%, ou porcentaxe superior, o promedio da súa plantilla de traballadores con contrato indefinido nos seus centros de traballo no municipio de Vigo, durante o período impositivo anterior, terán unha bonificación do 35% na cota do Imposto.

Entenderase a efectos da concesión da presente bonificación que se produce incremento do promedio da plantilla por comparación entre o número de persoas traballadoras con contrato indefinido no período final comparado (31 de decembro do período impositivo previo ao da solicitude) co período inicial comparado (31 de decembro do período anterior ao previo da solicitude).

A solicitude de bonificación deberá presentarse antes do 31 de marzo do exercicio para o que se pide a bonificación.

As bonificacións reguladas neste artigo poderán aplicarse de forma simultánea e sucesiva agás as sinaladas nos apartados 1) e 2) que son incompatibles entre elas e, co límite que establece a regra 16 da Instrución.

A bonificación regulada no apartado 5 deste artigo será de aplicación a partir do 1 de xaneiro de 2004 de conformidade co disposto na disposición adicional oitava apartado 1 da Lei 51/2002 de 27 de decembro. As bonificacións reguladas nos apartados 1 e 2 deste artigo serán de aplicación aos suxeitos pasivos que inicien a súa actividade a partir do 1 de xaneiro de 2003. Os suxeitos pasivos que a 1 de xaneiro de 2003, non estando exentos do imposto, de conformidade co regulado no artigo 5.1.b) desta Ordenanza, estiveran desfrutando das bonificacións por inicio de actividade anteriormente reguladas nesta Ordenanza continuarán desfrutando daquelas ata a finalización do período de aplicación.

ARTIGO 7.- TARIFAS E COTA TRIBUTARIA.

1. As tarifas do Imposto de Actividades Económicas e a Instrución aprobadas por Real Decreto Lexislativo 1175/90 de 28 de setembro e Real Decreto Lexislativo 1259/91 de 2 de agosto, comprenden:

- a) A descrición e contido das distintas actividades económicas clasificadas en actividades empresariais, profesionais e artísticas.
- b) As cotas correspondentes a cada actividade, determinadas mediante a aplicación dos correspondentes elementos tributarios regulados nas tarifas e na Instrución.

2. As cotas contidas nas tarifas, clasifícanse en:

- a) Cotas Mínimas Municipais
- b) Cotas Provinciais
- c) Cotas Nacionais

3. Son cotas mínimas municipais, as que, con esta denominación, aparecen especificamente sinaladas nas Tarifas, sumando, no seu caso, o elemento superficie dos locais nos que se realicen as actividades gravadas, así como calquera outras que non teñan a cualificación expresa, nas referidas Tarifas, de cotas provinciais ou nacionais.

4. Igual consideración de cotas mínimas municipais terán aquelas que, por aplicación do disposto na Regra 14^a.1.F) da Instrución, o seu importe está integrado, exclusivamente, polo valor do elemento tributario de superficie.

5. Son cotas nacionais ou provinciais, as que con tal denominación aparecen nas tarifas.
6. Cando a actividade de que se trate teña asignada máis dunha das clases de cotas ás que se refire o artigo 7.2 desta ordenanza, o suxeito pasivo poderá optar polo pago de calquera delas, coas facultades sinaladas nas Regras 10,11 e 12 respectivamente da Instrución.
7. As Leis de Presupostos Xerais do Estado, poderán modificar as tarifas do Imposto e actualizar as cotas contidas nas Instrucións aprobadas por Real Decreto Legislativo 1175/90 e 1259/91.
8. Aos efectos deste imposto considéranse locais, as edificacións, construcións e instalacións, así como as superficies cubertas ou sen cubrir, abertas ou non ao público que se utilicen para calquera actividade empresarial ou profesional.
9. Non teñen a consideración de locais, a efectos deste imposto, os elementos sinalados no apartado 1 da Regra 6^a da Instrución.
10. Consideraranse locais separados os que enumera o apartado 2^a da Regra 6^a da Instrución.
11. Cando un ben se destine conxuntamente a vivenda e ao exercicio dunha actividade gravada, só terá a consideración de local a efectos do imposto, a parte do ben na que, efectivamente, se exerza a actividade de que se trate.
12. Os profesionais que non exerzan a súa actividade en local determinado tributarán naquel municipio onde radique o seu domicilio fiscal, e as súas actuacións fóra daquel municipio non darán lugar a cota adicional ningunha por este imposto. Igualmente, as actuacións que realicen os profesionais fora do termo municipal onde radique o local da súa actividade, non darán lugar a pagamento de cota adicional ningunha por este imposto.
13. Os artistas tributarán no Municipio onde radique o seu domicilio fiscal, satisfacendo naquel unha soa cota municipal que os faculta para realizar dentro e fóra do termo municipal cantas actuacións foran propias de ditas actividades. Entenderase que as actividades artísticas non se realizan en local determinado.

ARTIGO 8.- COEFICIENTE ÚNICO E ÍNDICES DE SITUACIÓN.

1. Sobre as cotas modificadas pola aplicación do coeficiente de ponderación previsto no artigo 9.1 b) desta Ordenanza, o Concello de Vigo establece a seguinte escala de coeficientes que ponderan a situación física do local, atendendo a categoría da rúa na que radique:

<u>Categoría Fiscal</u>	<u>Coeficiente Situación</u>
1 ^a	3,70
2 ^a	3,46
3 ^a	3,28
4 ^a	3,01
5 ^a	2,80
6 ^a	2,54

2. A categoría fiscal de aplicación será a que figure na relación anexa á Ordenanza Fiscal Xeral deste Concello.

3. Cando algún vial non apareza comprendido na mencionada relación de rúas, aplicarase provisionalmente o coeficiente de situación que corresponda á última categoría fiscal.

4. Para determinar o coeficiente de situación, cando sexan varias as vías públicas a que dea a fachada dun establecemento ou local, tomarase o coeficiente que corresponda á vía de categoría superior, sempre que nesta exista –aínda en forma de chaflán- acceso directo e de normal utilización ao recinto.

5. No suposto de que, por atoparse en sotos, plantas interiores, etc., os establecementos ou locais carezan propiamente de fachadas á rúa, aplicarase o coeficiente de situación correspondente á categoría da rúa onde se atope o lugar de entrada ou acceso principal.

ARTIGO 9.- COTA MUNICIPAL E RECARGO PROVINCIAL.

1. Para o cálculo da cota resultante ou cota a ingresar, haberán de terse en conta os seguintes extremos:

a) Tanto as cotas mínimas municipais, como as cotas provinciais e nacionais, están integradas pola suma de dúas magnitudes distintas:

a.1 En primeiro lugar, pola cantidade sinalada en cada caso nas Tarifas do Imposto, que se corresponde co elemento dinámico constituído polo exercicio da actividade (potencia instalada, poboación de dereito, aforo de locais e superficie dos locais).

a.2 En segundo lugar, pola cantidade que resulte de valorar-lo elemento tributario constituído pola superficie dos locais nos que se exerce a actividade de que se trate, de conformidade co disposto na regra 14ª.1.F) da Instrución. Esta valoración do elemento tributario superficie, non se aplicará na determinación de cotas que nas Tarifas tivesen en conta expresamente, como elemento tributario, as superficies dos locais.

b) Sobre as cotas calculadas segundo o apartado a) anterior, aplicaranse, en todo caso, os seguintes coeficientes de ponderación en función do importe neto da cifra de negocios do suxeito pasivo, de conformidade co disposto no artigo 86 do RDL 2/2004 de 5 de marzo (TR da Lei Reguladora das Facendas Locais):

<u>Importe neto da cifra de negocios en euros</u>	<u>Coefficiente Ponderación</u>
Dende 1.000.000,00 ata 5.000.000,00.....	1,29
Dende 5.000.000,01 ata 10.000.000,00.....	1,30
Dende 10.000.000,01 ata 50.000.000,00.....	1,32
Dende 50.000.000,01 ata 100.000.000,00.....	1,33
Máis de 100.000.000,00.....	1,35
Sen cifra neta de negocio.....	1,31

Aos efectos da aplicación do coeficiente a que se refire este apartado b), o importe neto da cifra de negocios do suxeito pasivo será o correspondente ao conxunto de actividades económicas exercidas polo mesmo e determinarase de acordo co previsto na letra c) do apartado 1 do artigo 5 desta Ordenanza.

2. Se o suxeito pasivo optase, porque así o permiten as tarifas, por cota nacional o provincial, a cota resultante a ingresar, será a que resulte do cálculo sinalado nos apartados a) e b) anteriores sen que proceda aplicación de coeficiente de situación nin recargo provincial. A súa exacción corresponde a Axencia Tributaria do Estado.

3. Se o suxeito pasivo optase por cota municipal ou fose de obrigatoria aplicación, a cota municipal será o resultado de multiplicar a cota mínima municipal, obtida segundo se describe nos apartados a) e b) anteriores, polo coeficiente de situación sinalado no artigo 8 desta Ordenanza.

O recargo provincial calcularase aplicando a porcentaxe establecida pola Deputación Provincial de Pontevedra sobre a cota mínima municipal obtida segundo se describe nos apartados a) e b) anteriores.

O importe a ingresar polos suxeitos pasivos deste imposto que tributan por cota municipal será a suma desta cota máis o recargo provincial.

4. Se unha mesma actividade se exerce en varios locais, o suxeito pasivo estará obrigado a satisfacer tantas cotas mínimas municipais, incrementadas co coeficiente de situación, regulado no artigo 8 desta Ordenanza, cantos locais nos que exerza a actividade. Se nun mesmo local se exercen varias actividades, satisfacerán tantas cotas como actividades se realicen, aínda que a persoa titular de estas fose a mesma persoa ou entidade, aplicando para a valoración do elemento superficie, o disposto na Regra 14^a.1.F) f) da Instrución.

ARTIGO 10.- PERÍODO IMPOSITIVO E DEVENGO DO IMPOSTO.

1. O período impositivo coincide co ano natural, excepto cando se trate de declaracións de alta, en que abarcará dende a data de comezo da actividade ata o final do ano natural.

2. O imposto devéngase o primeiro día do período impositivo e as cotas serán irredutibles, agás cando, nos casos de declaración de alta, o día de comezo da actividade non coincide co ano natural. Neste suposto, as cotas calcularanse proporcionalmente ao número de trimestres naturais que restan para finaliza-lo ano, incluído o do comezo do exercicio da actividade.

3. Así mesmo, e en caso de baixa por cese de actividade, as cotas serán prorrateables por trimestres naturais, excluindo aquel no que se produza dito cese.

Os suxeitos pasivos poderán solicitar devolución da parte proporcional de cota relativa aos trimestres nos que non se tivera exercido a actividade.

4. Tratándose de espectáculos, cando as cotas estean establecidas por actuacións illadas, o devengo prodúcese pola realización de cada unha delas.

ARTIGO 11.- XESTIÓN.

1. A xestión do imposto axustarase ao disposto no RDL 2/2004 de 5 de marzo (TR da Lei Reguladora das Facendas Locais), Lei 58/2003 de 17 de decembro Xeral Tributaria, Real decreto 243/1995 de 17 de febreiro, Ordenanza Fiscal Xeral do Concello e restantes normas que resulten de aplicación.

2. O imposto xestiónase a partir da matrícula deste. Dita matrícula formarase anualmente pola Administración Tributaria do Estado e estará constituída por censos comprensivos das actividades económicas, suxeitos pasivos, cotas mínimas e, no seu caso, recargo provincial.

3. A matrícula de cada exercicio pecharase a 31 de decembro do ano anterior e serán incluídas as declaracións de variacións e baixas presentadas ata 31 de xaneiro e que se refiren a feitos anteriores ao 1 de xaneiro.

4. A matrícula expoñerase ao público dende os días 1 ao 15 de abril de cada ano.

5. O Concello publicará anuncio da exposición no Boletín Oficial da Provincia e nun dos diarios de maior difusión da provincia. A matrícula estará a disposición do público nas oficinas municipais.

ARTIGO 12.- ALTAS, BAIXAS E VARIACIÓNS.

1. Os suxeitos pasivos están obrigados a presentar, ante a Delegación da Axencia Estatal de Administración Tributaria, as correspondentes declaracións censais de alta manifestando tódolos elementos necesarios para a súa inclusión na Matrícula nos termos establecidos no artigo 90.1 do RDL 2/2004 de 5 de marzo (TR da Lei Reguladora das Facendas Locais) e dentro do prazo que regulamentariamente se estableza. A continuación a Administración Tributaria do Concello practicará e notificará a liquidación procedente.

2. Os suxeitos pasivos estarán obrigados a comunicar á Delegación da Axencia Estatal, as variacións de orde físico, económico ou xurídico que se produzan no exercicio das actividades gravadas e que teñan transcendencia a efectos deste imposto. Formalizará estas comunicacións nos prazos e termos regulamentariamente determinados.

3. As declaracións de alta haberán de presentarse no prazo dun mes, dende a data en que se produza o inicio da actividade.

4. En particular, os suxeitos pasivos aos que non lles sexa de aplicación a exención prevista no apartado c) do punto 1 do artigo 5 desta Ordenanza, deberán comunicar a Axencia Estatal de Administración Tributaria o importe neto da súa cifra de negocios. Así mesmo, os suxeitos pasivos deberán comunicar, as variacións que se produzan no importe neto da súa cifra de negocios cando tal variación

supoña a modificación da aplicación ou non da exención prevista na apartado c) do punto 1 do artigo 5 desta Ordenanza ou unha modificación no tramo a considerar a efectos da aplicación do coeficiente de ponderación previsto no artigo 8.a) desta Ordenanza. O Ministro de Facenda establecerá os supostos en que deberán presentarse estas comunicacións, o seu contido e o seu prazo e forma de presentación, así como os supostos en que haberán de presentarse por vía telemática.

5. As declaracións de baixa haberán de presentarse no prazo dun mes, dende a data en que se produza o cese de actividades.

ARTIGO 13.- DISTRIBUCIÓN DE COMPETENCIAS DE XESTIÓN ENTRE A ADMÓN. DO ESTADO E O CONCELLO E OS CORRESPONDENTES RECURSOS.

1. Corresponde á Administración Tributaria do Estado a formación da matrícula, a cualificación das actividades económicas e o sinalamento das cotas correspondentes.

2. Contra os actos de inclusión, exclusión, alteración de datos, cualificación de actividades e sinalamento de cotas, os suxeitos pasivos poderán interpoñer recurso de reposición ante a Administración Tributaria do Estado que corresponda ou reclamación económico-administrativa.

3. As modificacións de matrícula por causa de estimación de recursos de reposición, haberán de ser comunicadas ao Concello antes do día 31 de xullo do exercicio a que se refire a matrícula.

4. O Concello de Vigo ten asumido, por delegación, as funcións de Inspección do Imposto sobre Actividades Económicas, de conformidade co disposto no Real Decreto 566/1992 de 29 de maio, polo que se modifica o artigo 17 do Real Decreto 1172/1991 de 26 de xullo, polo que se ditan normas para a xestión do Imposto de Actividades Económicas. Estableceranse fórmulas de colaboración coa Admón. Tributaria do Estado para os cometidos de Inspección.

5. O Concello é competente para a liquidación e recadación deste imposto, así como da revisión de actos ditados en vía de xestión tributaria, comprendendo as funcións de concesión e denegación de exencións, e bonificacións, de realización de liquidacións conducentes á determinación das débedas tributarias, recepción de autoliquidacións, emisión dos instrumentos de cobro, resolución dos expedientes de devolución de ingresos indebidos, resolución de

recursos que se interpoñen contra estes actos e actuacións para información e asistencia ao contribuínte referidas ás materias comprendidas neste parágrafo.

6. Contra os actos ditados en vía de xestión tributaria relacionados no parágrafo 5 deste artigo, os suxeitos pasivos poderán interpoñer recurso de reposición ante o Concello no prazo dun mes contado dende o día seguinte o de notificación ou, no caso de recibos de Padrón anual, dende o día seguinte o de finalización do período voluntario de pagamento.

ARTIGO 14.- INFRACCIÓNS E SANCIÓN.

No relativo á cualificación de Infraccións Tributarias, así como ao relativo ás sancións que correspondan en cada caso, estarase ao disposto na Lei 58/2003 Xeral Tributaria, Ordenanza Fiscal Xeral, e restante normativa que resulte de aplicación.

DISPOSICIÓN TRANSITORIA.

De conformidade coa Disposición Transitoria 7ª da Lei 51/2002 de 27 de decembro, os suxeitos pasivos que, con anterioridade ao 1 de xaneiro de 2003 tiveran recoñecidas as bonificacións reguladas anteriormente na nota común 2ª da Sección 1ª e na nota común 1ª da Sección 2ª das Tarifas reguladas en Real Decreto Lexislativo 1175/1990, continuarán desfrutandoas nos termos vixentes ao tempo do inicio do seu desfrute, ata a finalización do seu correspondente período de aplicación.

DISPOSICIÓN FINAL.

Esta modificación entrará en vigor ao día seguinte da súa publicación no BOP e comenza a aplicarse o 1 de xaneiro de 2026 permanecendo vixente en tanto non se acorde a súa modificación ou derogación expresa.

PUBLICACIÓN B.O.P.:	30 DE DECEMBRO DE 2003
	29 DE NOVIEMBRE DE 2004
	7 DE NOVIEMBRE DE 2005
	30 DE DECEMBRO DE 2006
	10 DE DECEMBRO DE 2007
	10 DE DECEMBRO DE 2008
	11 DE DECEMBRO DE 2009
	14 DE DECEMBRO DE 2010
	22 DE NOVIEMBRE DE 2011
	21 DE DECEMBRO DE 2012
	25 DE NOVIEMBRE DE 2015

7 DE DCEMBRO DE 2017
12 DE NOVEMBRO DE 2019
15 DE DCEMBRO DE 2021
4 DE DCEMBRO DE 2023
12 DE DCEMBRO DE 2024
28 DE NOVEMBRO DE 2025